

10 Komuniti UMS



Konvensyen Fiqh Borneo yang berlangsung di Dewan Kuliah Pusat 1.

Konvensyen Fiqh Borneo Julung Kali di UMS

oleh: Badaria Bahar

AHAD, 30 Mac – Kelab Rakan Masjid Universiti Malaysia Sabah (UMS) telah mengadakan Konvensyen Fiqh Borneo buat pertama kali di sini untuk mendedahkan kepada masyarakat terutamanya kepada mahasiswa dan mahasiswi UMS tentang cabang ilmu fiqh Islam iaitu Fiqh Ibadah, Fiqh Munakahat dan Fiqh Perubatan.

Konvensyen ini diadakan di Dewan Kuliah Pusat 1, UMS. Penceramah-penceramah terkenal seperti Dr. Awisul Islah Ghazali, Ustaz Ahmad Fahmi serta Ustazah Syadiya Abbas diundang sebagai panel untuk menerangkan lebih lanjut berhubung dengan fiqh-fiqh Islam tersebut.

Terdapat tiga slot dalam konvensyen ini. Slot pertama adalah

berkaitan dengan Fiqh Perubatan yang dikendalikan oleh Dr. Awisul Islah Ghazali. Beliau merupakan Pengerusi Pertubuhan Amal Perubatan Ibnu Sina Malaysia (PAPISMA) merangkap Pakar Perunding Bius, ICU dan Sakit Kronik, Hospital Queen Elizabeth 1. Beliau membincangkan tentang perubatan moden dan Islam.

Slot kedua merupakan Fiqh Ibadah yang dibimbing oleh Ustaz Ahmad Fahmi yang membincangkan syurga solat. Beliau berkelulusan Syariah, Universiti Al-Azhar, Mesir. Beliau menunjukkan secara terperinci cara pergerakan dalam solat dengan melakukan demonstrasi secara langsung di hadapan penonton.

Slot terakhir adalah berkenaan Fiqh Munakahat yang diterangkan oleh Ustazah Syadiya Abbas. Beliau merupakan Pengacara Fiqh Wanita di TV3. Fiqh ini membincangkan khusus tentang munakahat iaitu membina cinta di alam rumah tangga. Slot ini sedikit sebanyak menerangkan cara dan kepentingan untuk membina cinta selepas mendirikan rumah tangga.

Penampilan istimewa Imam Muda Naim iaitu Imam Muda musim ketiga dalam slot khas turut menyerikan lagi suasana Konvensyen Fiqh Borneo ini.